

**LAUS de Leoun TEISSIER**  
**Felibre Majourau**  
**1883-1981**

**Cigalo de Carcassouno o de l'Amourié**

**Marcèu DAUMAS**  
Curat-Archiprèire de Fourcauquié  
Felibre-Majourau  
Santo-Estello d'Espalioun - Pandecousto de 1983

*Gènto Rèino,  
Segne Capoulié,  
Car Counfraise,  
Ami Felibre,*

*D'ounoura lis ancian es un devé, coume es un devé de bèn coumpli li pichòti causo,  
pèr se rendre capable de n'en coumpli de grando.  
Aquesto fraso qu'escriguè Leoun Teissier en 1956, me semblo bon de la metre au  
pountin, aro qu'ai l'ounour vuei de lausa soun noum, sa vido, soun obro.*

Me creirès bèn voulountié se vous dise que siéu mai que mai vergougnous de devé parla d'un ome que, setanto an de tèms fuguè marca au cartabèu e, mai de cinquanto an, pourtè sus lou pitre la cigalo de Carcassouno o de l'Amourié. Es quasimen uno istòri dóu Felibrige à n'éu soulet. Mai qu'un ome, es un mounumen — mounumen de sagesso e de souldita, mounumen de fe e d'esperanço felibrenco — e quouro legisse, à prepaus de la Felibrejado de Ceto de 1910: — *Coume ère aqui, crese pas inutile d'apoundre quàuqui precisioun*, me sente bèn pichot davans uno talo memento, qu'es, coume lou dis l'istourian Lenôtre, la souleto poussibleta de faire s'abouca lis istourian.

Pamens, coume auriéu pouscu lou mai counèisse.

Figuras-vous que lis asard de l'amenistracioun faguèron mounta mi gènt, en 1935 à n'Avesnes-sur-Helpe, pichoto souto-Prefeituro i raro de la Bèugico, ounte lou counservadou dis Ipouteco èro tout justamen Leoun Teissier. Un vièi perceptour, retreta à Fourcauquié, a couneissu eilamount mi gènt e li Teissier — m'a dit que se vesien — mai iéu n'ai ges de souveni. Seguramen, m'agradavon mai, à n'aquéu mounen d'aqui li goubiho, que lis ipouteco e sa counservacioun.